

梧溪集附補遺
一

梧溪集卷第一

孔子琴操四首

江陰王逢原吉

去魯作

汶泗交流兮，龜蒙相繆兮。鬱乎尼丘兮，禮樂賜自周兮。大夫好脩兮，吾將返吾輶兮。

過匡作

文王徂兮，道在予兮。天蓋常時則淪兮，二三子毋徐徐兮。伊草露之濡兮，

去衛作

我行于衛，有淇湯湯。彼或知本，伊流則長。載儻載仞，禾黍芒芒。匪邯鄲予傷，武公其亡。

厄陳作

天地塞兮，日月食兮。君子厄兮，周公云遠。心不知所底極兮，

顏子琴操一首，居陋巷作

陋居我居，孰隘湫兮。薄田我田，孰嗇收兮。我順我安，親同休兮。仲尼聖也，道孰侔兮。孰愈予身，從其遊兮。

吳季子琴操一首，聘魯作

白日晚兮浮雲滋。馬吾秣兮車吾脂。望岐周兮不見。念泰伯兮在茲。惟山有龜兮。惟水有沂。禮樂在魯兮。高深如斯。聖不我棄兮。吳其庶幾。

衛女琴操一首思歸作有序

琴操曰。衛有賢女。邵王聞其賢。請聘之。未至而王薨。太子曰。吾聞齊桓公得衛姬而霸。今衛女賢。欲留之。大夫曰。不可。若賢女。必不我聽。若聽。必不賢。不可取也。太子遂留之。果不聽。拘於深宮。思歸不得。援琴作歌。曲終。縊而死。古有弦無歌。今弦亦絕矣。因補一章。

恭承母命兮。奉先王。咳。姓後宮兮。備酒漿。中路王薨兮。妾或未亡。遂太子之過兮。何有三綱。淇水沄沄兮。菀乎女桑。目冷弦絕兮。義也難忘。

席帽山辭

席帽山兮。岿亭山之人兮。朝鉏暮經。日月往來兮。雲下上。俯萬物兮。塵冥冥。塵冥冥兮。江介黑。彼山人兮。衣苧白。帶社蘅兮。咀松柏。心周流兮。影斯息。出無節兮。入無時。猿鳥胥樂兮。樵牧我知。學苟脩兮。行著。稿死巖壑兮。予焉悲。

寄所思二首

七澤連三湘。衆水相沿洄。青青蒹葭草。緣生洲渚隈。蒼梧下白日。佳人獨徘徊。容光與香豔。幸好未衰摧。采采盈襜裳。寄子楚王臺。願表貞素節。路紆難自來。

處女難自媒。才士難自薦。自薦時尙可。自媒令人賤。猗儺牽牛花。弱蔓緣兼葭。光風拂衢路。蘭自老幽遐。豈無上尊酒。灑灑傾紫霞。公庭大酺暇。儻寄天之涯。

龐公攜家圖引爲張橘隱題

鴻鵠巢高林。龍窟穴深淵。所以龐德公。躬耕峴山田。當時劉表儕雄材。萬金足置燕王臺。臺成禽荒甘煖毒。醉轄臂錦呼鷹來。鷹飢受呼飽則去。非熊之倫孰得馭。諸兒豚犬遺以危。況復蒼生天下慮。蘇嶺石鹿雙聳然。霞日絢爛芝莖鮮。囊衣裹糗車連連。白驃青牂參後先。舉家相攜入長煙。竟託採藥終天年。至今事跡有在心。無傳。嗚呼孔明不遇大耳主。亦必老向隆中眠。

虞美人行贈邵倅

大王氣蓋世。力拔山。七十餘戰龍蛇閒。得人爲霸失人虜。有妾如花無死所。夜寒蒼蒼星月高。不惜傾身帳中舞。大王恩深淺。東海青血熒熒春草在。當時早化劍雙飛。四面楚歌那慷慨。芒碭天開五色雲。雌雄竟與雄鸞羣。嗚呼後世亂紛紛。非君擇臣臣亦當擇君。

唐馬引

明皇樂極天寶年。拏舟將求海上仙。一朝神遊跨八極。數十萬騎屯雲煙。赤文綠字不復見。錦幃黃帕爭來獻。衆中一匹目如電。膺門沫赭珠流汗。龍顏眷愛不肯騎。蕭蕭弄影華清池。奚官日給三品料。教駢攻駒隨所之。是時羊車行幸早。柳暗花柔忘卻曉。夢驚鼙鼓遂播遷。凝碧空涼遺宿草。顛危注意大將賢。有

馬如此無人前。至今悲風起毫素。漢略欲飲長城泉。書生亦自心嗒然。

危腦帽歌讀五代前蜀史有感而作

白兜羅青衲襖。金鴉翠翎七寶飾。圓方反正無定式。國人戴之天下惜。後宮如花醉妝美。名王無心冠帶理。大木晝拔貪狼風。猶汎樓船濟江水。承平禮樂亦草草。豈但當時帽危腦。可憐來者忘喪元。紅纓末亂如雲擾。君不見玉帛萬國先王朝。會弁如星麗九霄。鳳皇麒麟在郊。橄。夔龍前殿奏簫韶。

天門行

天門高高俯四極。寸田尺地登版籍。澤梁無禁漁者多。瀚海橫戈恣充斥。去年官饑私斂攘。今年私醢官價償。屠燒縣邑誠細事。大將不死鯨鯢鄉。謂李羅帖木兒左丞烹羊椎牛醉以酒。腰纏白帶紅帕首。定盟歃血許自新。禦寇征蠻復何有。國家承平歲月久。念汝紛紛迫餬口。羽林堅銳莫汝撓。慎勿輕夸好身手。春風柳黃開陣雲。號令始見眞將軍。

銀瓶孃子辭有引

孃子宋岳鄂王女。聞王被收。負銀瓶投井死。祠今在浙西憲司之左。逢感其節孝。敬爲之辭。

碧梧月落烏號霜。寒泉幽凝金井牀。綺疏光流大星白。夢驚萬里長城亡。女郎報父收囹圄。匍匐將身贖無所。官家聖明如漢主。妾心愧死緹縈女。井臨交衢下通海。海枯衢遷井不改。銀瓶同沈意有在。萬歲千春露神采。魂今歸來風泠然。思陵無樹容啼鵑。先王墓木西湖邊。

江浙平章三旦八第宅觀勅賜龍電劍引

有劍有劍龍電名。白水爲質金爲精。虹光夜貫斗牛氣。玉匣晝起波濤聲。藏之九廟社稷重。用之六合風塵清。英宗皇帝加撫惜。八十一鱗寒動色。灤陽冰泮臥蜿蜒。海子雨來翻霹靂。神物自從前代寶。國公親授彤庭錫。鵬鵠膏瑩今幾年。淮汴襄漢興妖祲。呂虔大刀霜雪鏑。頓芒挫鋒莫敢前。公身佩之下幽燕。獨當一面東南天。馬蹄所過春草歇。百里青見孤炊煙。古來尅敵與制勝。未有如公忠勇盛。主將無慚李藥師。偏裨亦是花驚定。四郡九州聯貢篚。千村萬落歸亡命。劍當是時成大勳。凱旋卻挂吳山雲。歌長奔騰木石怪。酒酣激烈貔虎羣。復欲扣關斬佞臣。以謝父老安生民。於乎此劍實與國公出處相類也。不久踴躍變化延平津。

任月山少監職貢圖引

好風東來快雨俱。夫須亭觀職貢圖。厥曾高鼻深目胡。冠插翟尾服繡襦。革帶鞢褭貂襜褕。左女執蓋右執壺。手容恭如下大夫。曾妻髻椎將湛盧。五采雜珮相縈紆。轉顧飛虎飛龍旗。鏤耳者殿帕首驅。環絡袒跣兩侏儒。一擎木難珊瑚株。一戴玉琢狻猊鑪。神葵鬢髻狀乳獮。復誰牽之懸髮須。最後我弁飾寶珠。若將入朝謹進趨。禿奚踉蹌亦在途。錦膊驄帶汗血駒。尊貴卑賤各爾殊。經營意匠窮錙銖。唐稱二閭道元。吳今也少監稱京都。少監材抱豈畫史。禹蹟曾爲帝親理。河伯川后備任使。無支祈氏甘胥靡。大得延祐貞觀比。輦陸航海填筐篚。烏言夷面遠能邇。少監臨古不無以。趙公商公暨高李。顏頤霄漢嗟已矣。霽雲

曙開儼斧屐，包茅不入賴誰泚。周編大書王會禮，安得臣臣奉天紀。陋儒作歌歌正始。

淮安忠武王箭歌題垂虹橋亭

淮王昔下江南城，萬竈兵擁雙霓旌。錦裘繡帽白玉帶，金戈鐵馬紅盤纓。阜鵬羽箭三十六，一一插向鯨魚簾。鹿麕晝號猿抱木，王師所過全生育。彤弓親授聖天子，弓影射入東吳水。水波恍浸銅柱標，仰見浮屠半霄起。王當是時戡武功，指顧草樹生春風。宋家降璽朝暮得，思罷貫革垂無窮。浮屠上層龍所宮，寶盤紺碧蓮花同。弦張滿月報騶發，忽露半筈薊雲中。饒歌調轟鼓笳競，父老頓足驢聲應。泗州使返睢陽亡，漢關將入天山定。兩賢成敗關衰盛，雄材逸氣王誰竝。我浮扁舟五湖興，載拜何由重安靖。猛士經過合深省。

僧蓮松檜圖歌書遂昌山人鄭明德序後

蓮公畫稱東吳精，草蔓花房未嘗寫。森張意象亭毒表，輒有神人助揮灑。常州貌得劍井松，劍氣曠溫相鬱蔥。膏流節離禍幸免，至今顏色青於銅。孔廟之檜尤硃硃，地媼所守龍所窟。欒柯落陰根走石，疑是忠臣舊埋骨。松兮檜兮豈偶然，陵霜轢雪兵燹年。箭痕刀瘢盡皸裂，用命欲拄將崩天。王姚王安節姚憑城親被堅，身殲城破百代傳。無人上請配張許，日夜二物風雷纏。鄭君鄭君古君子，此文此畫良有以。我題短章非闕靡，用弔忠魂附遺史。吁嗟烈士長已矣。

敬題楊山居太史所藏文皇帝御書奎章閣碑本後

先皇龍鳳姿。談笑夷內難。萬方賀清寧。人文劃昭煥。奎章崇延閣。天藻發宸翰。字畫擬庖犧。贊詠缺姬旦。璇霄麗日月。華露濯河漢。流腴蓬萊池。垂耀鵷鵠觀。今王廣舊制。碑本無點竄。璽封賜臣瑀。豈是世所玩。爲爾忠義心。可與金石貫。蟲蛇深禹穴。蟬蛸飛簡汗。寶藏風塵外。永夜卿雲爛。相逢感頭白。展卷復三歎。游儻懷故淵。老驥戀餘棧。誰昔侍經筵。流連忘筆諫。

七里灘夜泊

山經富春來。百里紫翠接。嚴灘十八曲。曲曲屏數疊。兩厓負金鼇。一水流冰硤。直上石作臺。梯磴緣巖業。雲霏變昕夕。天地齊浩劫。緬懷巢許徒。遁此誠所愜。千秋釣游地。不屬漢臣妾。客星在沈寥。五緯光相射。澄潭龍偃臥。影帶沙棠楫。風吹澗沚毛。露灑松桂葉。先民不可見。思從漢臯涉。夜久蜻蛚高。長歌振疲瘁。

王貞白墓在信州永豐縣

道出縣西門。躡履可百步。巋然翠石表。有唐校書墓。校書吾宗人。天馬謝羣御。首登上昇名。晚獲鄉曲譽。至今坊改貫。當時官復賦。流傳折楊柳。婉婉春態度。載拜還汛掃。良非汾陽慕。龍貴德自潛。豹貴文不露。邱園望京洛。豺犬方反顧。竟抱孤臣憂。白日空復暮。樵童指梧楨。往往冠蓋駐。珠襦玉匣葬。麥飯曾不具。神飈薦林響。公意答知遇。惟南豐山高。靈溪浩東注。

馬洲望孤山

海門窺長江。鉅浸天浩淼。山根纏坤軸。百里見孤杪。風披陰霾晝。露灑石黛曉。龍來蒼林溼。鷗舞白浪杳。

居然蔽中洲。隱若壓外傲。幽貞水仙態。軒特國士表。時時降天人。旌旆光縹緲。予將展高步。兵氣秋見兆。嚴霜草不殺。悵望翠清悄。浮雲非無蒂。薄暮心裊裊。

揚子舟中望鵝鼻山時聞黔南消息

山環芙蓉城。私怪鵝鼻狀。奔濤鎮長薄。大石山名山凜相抗。勢雄千軍壘。氣斂萬鍾藏。草樹春不蕃。莓苔滑難傍。剛風過靈雨。復值桃花漲。破暝鷗鷺盤。乘陰龍魚王。飄鼓一葦閒。攬之膽增壯。謝安晉元臣。豈跼江海量。蒼生方顛連。其敢遂疎放。黔陽百粵地。黃霧吹虎鬚。再觀神秀姿。不止西北向。焯焯蒼精出。閃閃白月漾。三叫馮夷宮。吾奚獨惆悵。

奉題高宗答刑部侍郎衛膚敏詔後爲其七世孫仁近賦詔文附

勅膚敏。省所奏辭免尙書刑部侍郎恩命事。具悉。朕倉卒渡江。圖籍散亡。深慮吏緣爲奸。奏牘稽留。平讞失當。以卿平日正色倨倨。論議堅明。據誼守節。屢觸權貴。必能爲朕分別隱微。章明枉直。與其殺不辜。寧失不經。欽哉。汝諧。毋廢朕命。所請宜不允。故茲詔示。想宜知悉。七日。

建炎龍渡江。中外極觀仰。赫焉志恢復。濩爾濫刑賞。公時命秋官。固辭表三上。夙忝絲綸日。春班朝元仗。乘輿今播遷。宗社亦震蕩。空言忤權貴。曷以錯諸枉。放棄樗櫟材。庶全雨露養。皇覽賜手詔。於昭日月朗。大禹舍皐陶。欽恤義誰廣。巍巍白雲司。濯濯金仙掌。元陰閼棘木。一旦風颯爽。有疏甚詆佛。無愧十八丈。余山儼遺墓。世世敦禮享。文光掩虹霞。精氣懾夔魍。卓落羣松冷。萎蕤叢蘭長。經過率下馬。謂有神還往。

我昨歌大招，篴谷答靈響。衣冠久徘徊，氛壙方塊莽。願公降生申，吾得操几杖。

處女篇奉寄靳奉使

東州有處女，門戶代清白。七歲承母訓，十歲遵內則。及笄秉機杼，縠錦雲霧色。蟋蟀秋梨陰，想像龍鳳織。雙星望垂近，河漢終阻隔。不遺猗蘭佩，香豔竊比德。世無梁伯鸞，死化山下石。日薄黃塵暮，誰任補袞職。凡百慎裁量，願售古刀尺。三歎掩明妝，遲君心鑒識。

題烈女廟有引

女何江陰人，少有容操。五季時，避亂前湖舟中，賊持兵犯之，何泣曰：「吾身墮汝手，肯從吾禱之於天於父母乎？」賊由是少懈。何乃起立，且拜且祈，乘閒竟投水死。後里父夢見何曰：「吾當血食此地，伺湖爲田，則廟貌祀我。」既而果然。今廟在華藏寺南，郡志所載略異，逢蓋得先大母所傳云。

遺廟湖陰四百年，斑斑江竹映嬋娟。魚龍水落萑蒲外，雞犬村成槩柘邊。不待清名垂女史，尙存貞魄降神弦。君王社稷今焉在，伏臘粢盛自儼然。帷箔夜涼臨月榻，珮環晨響起雲輶。湘靈鼓瑟虞風盛，蔡琰聞笳漢鼎遷。嗟彼生還羞故國，何如死節報皇天。明妝靚服黃塵裏，重爲傷時涕泗漣。

錢塘春感六首

紫闥駟車從六龍，盡隨仙曲度青空。蒼山樓闕旃林裏，赤羽旌麾野廟中。百姓未忘周大賚，成都元有漢遺風。流鶯不管傷春恨，衝落桃花滿樹紅。

王氣淩虛散曉霞。虎闌麟閣靜煙花。中天日月迂黃道。滄海風雲冷翠華。望帝神遊夔子國。烏衣夢隔野人家。當時舉目山河異。豈但紅顏泣塞笳。
周南風俗漢衣冠。五色雲中憶駐鑾。瓔珞檜高藏白獸。藥珠花發降文鸞。河通織女機絲溼。雨歇巫娥翠黛寒。滿地吳山誰灑淚。一江春水獨凭闌。
日華初動袞衣明。劍佩千官隱繡楹。五色黼函開玉座。九重湯藥下銀罍。書題鳳尾仙曹喜。恩浹螭坳學士榮。文化有餘戎事略。銅駝草露不勝情。
瑤池青鳥集觚稜。白塔金鳧闕夜燈。雲母帳虛星采動。水晶宮冷露華凝。驪山草暗墟周業。郿塢花繁失漢陵。白馬素車江海上。依然潮汐撼西興。
金爵觚稜月向低。泠泠清磬萬松西。五門曙色開龍尾。十日春寒健馬蹄。紅霧不收花氣合。綠波初漲柳條齊。遺民暗憶名都會。尙繞湖溇唱大隄。

讀謝太皇詔稿

半壁星河兩鬢絲。月華長照素簾垂。衣冠在野收亡命。烽火連營倒義旗。天地晝昏憂社稷。江淮春漲泣孤嫠。十行哀詔無多字。落葉虛窗萬古思。

讀德祐元年悔過詔稿

趙壁潛張赤幟旗。東南民物惡琉璃。白毛地冷陽春歇。天目山崩王氣移。罪在股肱知太晚。患成心腹悔

何追兩宮無復西湖路。落日傷心草詔時。

題宋進士謝安節故堂有引

公爲晉太傅二十九世孫諱國光字觀夫登宋進士補太學上舍江南內附侍御史程鉅夫薦召不起以隱德終於松江之立極所居安節堂翰林應奉字文子貞嘗爲記至是孫晉徵題是詩晉字彥明善醫有文行

安節堂開秋浦涓。幾幾束帛聘當時。星辰盡拱天樞象。鴻鵠終巢越樹枝。多士頌周成廟樂。兩生辭漢闕朝儀。雲霄一去高風在。手折芙蓉爲仰思。

登飛龍亭在集慶永壽宮文皇帝潛邸時嘗幸焉

冶城新築紫金臺。亭俯青松面面開。南國風雲龍鳳起。陰山霜雪鴈鴻來。秦王大業知無敵。秦伯高名動九垓。天意竟乖方寸願。遺民搔首重興哀。

寄題張太元天師素華臺二首

玉臺岌嶭上冰輪。風露清虛隔幾塵。珠樹鶴羣長遶夜。金莖仙掌靜融春。斗牛星澹臨南極。龍虎山高俯七閩。中外晏安祠事少。一瓢明水獨朝眞。星斗闌干露氣清。神飈吹動珮環聲。雲封玉兔長生藥。人在丹邱不夜城。隱隱笙來王子晉。迢迢夢隔許飛瓊。世閒福地俱仙境。何日從容散髮行。

寄僕公遠應奉

桂樹團團不易攀。吹香墮子月中閒。君家總在蟾蜍窟。朝士同趨虎豹關。夜秉金蓮當閣道。時承玉食自天顏。別來已覺升沈異。休問牛歌未出山。

簡帖毅夫同知

三月春雲拂殿低。千官喜氣溢金闈。策陳讜議龍顏悅。表謝殊恩虎拜齊。南國幾年沾化雨。朔州今日現文奎。故人身在江湖上。不擬看花信馬蹄。

讀國信大使郝公帛書

有序

霜落風高恣所如。歸期回首是春初。上林天子援弓繳。窮海纍臣有帛書。中統十五年九月一日。放鴈。獲者勿殺。國信大使郝經。書於真州忠勇軍營新館。書蓋如此。公字伯常。仕世祖皇帝。庚申歲使宋。爲賈似道拘幽。十有六年。此書當在至元十一年。是時南北隔絕。但知紀元爲中統也。先是公羈旅日。有以鴈四十餉公。內一鴈體質稍異。命畜之。於後鴈見公。輒張翮引吭而鳴。公感悟。擇日率從者三十七人。具香北拜。二人舁鴈踞其前。手書尺帛。親繫鴈足。且致祝曰。纍臣某。敢煩鴈卿。通信朝廷。鴈其保重。欲再拜。鴈奮身入雲而去。未幾。虞人獲之苑中。以所繫帛書。託近侍以聞。上惻然曰。四十騎留江南。曾無一人鴈比乎。遂進師南伐。越二年宋亡。書今藏諸祕監。河南王客劉澹齋云。

西北皇華早。東南白髮侵。雪霜蘇武節。江海魏牟心。獨夜占秦分。清秋動越吟。蒹葭黃葉暮。苜蓿紫雲深。

野曠風鳴籟。河橫月暎參。擇巢幽鳥遠。催織候蟲臨。衣攬重裁褐。貂餘舊賜金。不知年號改。那計使音沈。國久虛皮幣。家應詠稿砧。豚魚曾信及。鴻鴈豈難任。素帛辭新館。敦弓入上林。虞人天與便。奇事感來今。

憶舊遊三首

醉酒高陽里。題詩左氏莊。碧雲垂草帶。紅旭散花房。流水循除活。飛絲拂鬢長。座中誰潦倒。遺卻紫香囊。臺迴林光合。峯孤岳影分。勢從平地湧。心與異人羣。解佩春相贈。鳴榔夜忽聞。時來面風渚。蕭灑誦吾文。紫藟妨過馬。青苔委佩魚。名通天上籍。腹有架間書。春水浮齋艦。山雲落板車。尙懷仁里好。耕鑿對休居。

過余剛中常清雲林二首

靈草綠含煙。桃花紅滿川。澹餐雲外粥。清供石間泉。雨響注春酒。風鳴彈夜弦。經過恐難覓。養鶴洞門前。一畝開齋館。三年守道心。乍來驚野鹿。久住識山禽。亂石浮春氣。長松落晝陰。世人知有此。翻畏白雲深。

光相洞

光相何年有。元和勅賜名。金天靈鷲下。黑雨石龍鳴。莎草迷行迹。桃花隔櫺聲。神遊到仙境。童子恍吾迎。

同周南野遊雨石山洞

地主周顒後。邀登雨石山。風巖寒六月。雲岫闢重關。珠閣參差是。芝田矚睥睨。洞天仙有籍。君得上清班。

重遊光相洞

霜葉下楓楠。蒼青石洞紺。六丁非假鑿。大禹若爲探。下接炎州海。幽生白日嵐。人傳古尊宿。曾此作禪龕。

洞虛觀玩月

獨立鬢蕭騷。天風吹綺袍。石林秋後薄。香殿月中高。句落丹山鳳。神遊滄海鼇。仙人渺何所。靈響度雲璈。

靳士達憲幙遣從子惟正邀飲西湖二首

樓艦圍青幙。宮壺絡錦絲。忘形犀首飲。留意鹿鳴詩。十里天開畫。雙峯月上眉。湧金饒夜色。歌吹送行遲。湖山千古勝。富貴一時心。茉莉花浮酒。芙蓉火炷沈。驄文停岸馬。繡羽並沙禽。再度雲回曲。蕭蕭鶴滿林。

題垂虹橋亭

長虹垂絕岸。形勢壓東吳。風雨三江合。梯航百粵趨。葑田連沮洳。鮫室亂魚鳧。私怪鴟夷子。初心握霸圖。

感宋遺事二首有引

至元十三年正月。伯顏丞相入杭。二月起宋三宮赴上都。五月見世祖皇帝。尋命幼主爲檢校大司徒。封瀛國公。十二日內人安康朱夫人。安定陳夫人二侍兒。失其姓。浴罷肅襟。閉門焚香於地。並雉經死。衣中有清江紙書云。不免辱國。幸免辱身。不辱父母。免辱六親。藝祖受命。立國以仁。中興南渡。踰三百春。躬受宋祿。羞爲北臣。大難既至。守於一貞。焚香設誓。代書諸紳。忠臣義士。期以自新。丙子五月吉日泣血書。

五月無花草滿原。天回南極夜當門。龍香一篆魂同返。猶藉君王舊賜恩。天遣南姝死北燕。宋朝家法最堪傳。當時賜葬崇雙闕。混一當過億萬年。

題馬遠小景二首

半天飛殿壓金鼈，一島春雲護小桃。
爭捧夜香熏御榻，君王來聽月中濤。
斑管書殘女史箴，水精深殿樂登臨。
荷花大得熏風意，一夏吹香上玉琴。

題趙文敏蘭

邯鄲夢覺策羸驂，薊雪幽霜味飽諳。
手寫蕙蘭天上滿，歸來春草暗江南。

題林和靖詩意圖

研池冰合草堂深，月在梅花鶴在陰。
一日盛傳詩句好，百年誰識紫芝心。

和靖未嘗娶，傳經業於獮子。至登第，以其事如元魯山也。故云。

題柯博士墨竹

奎章博士寫蒼筤，葉葉中含雨露香。
華髮歸來無限思，九疑山遠暮雲長。

題四皓圖凡二首

皓首厖眉四隱家，商顏山下遠秦蛇。
未應羽翼高飛鶴，回魄東陵五色瓜。
萬古乾坤一局碁，五文雲采九莖芝。
高皇自墮張良計，肯下山來進諫詞。

題南園菜亭下竹

此君同我出林邱，自有清風一種秋。
不作長鞭及馬腹，卻持貞節過人頭。
鄉人丁祐妻喪不再娶，號有髮僧予喜其有子。
爲贈絕句以發其微意。

傳家有子日將車。散髮從容候曉霞。若也斷弦膠可續。後堂風雨暗梨花。

題畫牛

南山春草碧油油。夕陽在背餘光留。僅容甯戚歌扣角。不受梁武金籠頭。

題杉溪老人家壁六言四首

十角犂牛前巷。一機黃絹比鄰。婦事姑嫜婉順。兒看賓客情親。朝夕一盂白飯。東西幾緡青鞵。邀客烹葵別墅。課兒題竹高齋。紅白花明水寺。青蒼樹邊沙村。夜多涼月照席。日有清風拂門。挂巾藤蘿石上。濯足芙蓉水頭。落日不逢過馬。東風忽亂驚鷗。

題李後主墨竹

斬斬金錯刀。稜稜鐵鉤鎖。寫盡江南春。曾不得蓬顆。

題趙子固蘭

月冷湘江珮。風傳鄭國香。氣同堯二女。秀比謝諸郎。

題李息齋竹

雨露恩深沐。風霜節愈高。本無斑染淚。秋思滿湘皋。

齋居